

吳文節公遺集

吳文節公遺集卷十二目錄

奏議

覆奏銀錢畫一章程摺

請將贛州府改爲調缺摺

覆奏訪查邪匪片

籌補缺漕摺

籌補京倉米石改由糧船灑帶摺

吳文節公遺集卷十三

男養原謹編

奏議

覆奏銀錢畫一章程摺

奏爲遵

旨核議覆

奏事竊臣接准戶部咨奉

上諭穆彰阿等奏遵旨會議御史劉良駒條奏銀錢畫一章程一摺銀錢並重本係制用常經果能隨時酌核不使輕重相懸裕國便民兩有裨益未可輒稱窒礙不

恩設法變通著該督撫等各就地方情形詳細體察悉心妥議具奏務使法立可以推行不致滋弊毋得任聽屬員巧爲推諉稍存畏難苟安之見僅以一奏塞責欵此抄錄原奏咨行到臣伏思近年以來銀價日昂幾無底止自須急圖挽救誠如

聖諭未可輒稱審礙不思設法變通是以臣於道光二十四年間卽思用錢代銀挽積重而裕財用奏請將各省一切留支款項收錢放錢以冀漸平銀價嗣經部議以各省留支之款出納總在一年銀非久貯錢亦卽流布民間恐於見多見少之意未必有效請先令江西試

行臣因細加體察留支之款收錢用錢旋納旋出實屬
效難驟期且一省試行鄰省市僉販錢而來適足以昂
銀價復經奏明毋庸試行在案茲准部咨議將各省留
支並司庫每年留用之項由各該督撫悉心詳核分別
收錢放錢並參酌前規以錢一千五百文准銀一兩奏
奉

諭旨著各就地方情形詳細體察妥議具奏

臣思設法

變通欲使銀錢並重非先籌收錢不可而收錢之數必
準乎放錢之數各省惟留支之項可以放錢而留支之
項惟各營兵餉爲大宗次則文武官養廉查兵餉爲兵

丁口食之需江西現在各兵支領餉銀一兩市價可易
錢一千九百餘文若以一千五百文准銀一兩放給折
耗甚多易滋藉口誠如部示應毋庸議至江西文武各
官養廉本有局鑄錢文搭放府道以上暨九江贛州二
鎮上年又續請加搭捐輸錢文核計已在三四成以上
亦難再行加搭祇可俟捐輸錢文搭放完竣再議按成
易錢搭放此外則惟有州縣坐支之俸工役食等項數
本不多江西各屬民間輸納錢糧大率多係以錢折納
凡解司之項地方官不得不易銀批解而由縣坐支者
旣不需銀卽多係收錢放錢無可變更至於九江贛州

兩關所收稅課皆係應行解部及聽候撥解鄰省并留支兵餉之用均未可以錢代收臣職任封圻受

恩深重事關裕

國便民如能設法變通於事有裨斷不敢畏難苟安今與藩司費開綏就江西現在情形悉心籌核留支項下兵餉旣未便輕議放錢無從變通而各州縣自行坐支之俸工役食等款又本係收錢放錢若就此項議以變通仍屬紙上空言無裨實濟均毋庸議惟文武養廉現雖搭錢成數較多遽難加搭將來捐輸錢文搭放完竣則所搭僅止局錢爲數已少自可酌分成數用錢搭放

吳文節公遺集

卷十三

容臣隨時酌量另行

奏明辦理所有臣悉心核議緣由理合據實覆

奏伏乞

皇上聖鑒訓示謹

奏道光二十六年六月十三日奏奉

硃批戶部知道欽此

請將贛州府改爲調缺摺

奏爲知府缺分繁要請援案改爲由外揀調以期人地
得宜恭摺具

奏仰祈

聖靈事竊照江西贛州府管理一廳八縣東界閩省南接粵壤向爲匪徒出沒之所兼之習俗犷悍健鬪之風甲於通省是以從前定爲衝繁疲難四字相兼要缺請旨簡放道光六年經前護撫臣嵩溥奏請由外揀員題調奉

旨交前督臣琦善撫臣韓文綺會議經該督等以該郡出缺均蒙

特旨簡放其才自可理繁治劇或人地不甚相宜亦可據實陳明請旨定奪奏請毋庸更改奉

旨允准嗣於道光十年因新任知府何增元人地未宜

經前督

臣蔣攸銛會同前撫

臣吳光悅具奏欽奉

諭旨將何增元留省另補並以該缺素稱難治

特飭該督等詳悉籌商或於所屬各省知府內遴員調補或於江西省候補知府內熟悉情形者補授經督臣等遴選得試用知府汪云任會奏請補奉

旨准行是此缺難治之處久在

聖主洞鑒之中近來搶劫擄捉之案猶復層見疊出甚有結連鄰省匪徒倚眾恃強肆出擾民每須該府親往督捕查辦必得素悉民隱督率有方之員方可得力伏

思蒙

恩簡放人員才具自屬出色第地方實爲繁要情形驟難知悉若非在西年久駕輕就熟之員則措施一或失當卽於地方難資整頓因查各省知府請旨之缺由外奏改題缺欽奉

特旨允准者有江蘇之淮安徐州兩府及河南之南陽府山東之曹州府其奏改題缺奉部議駁止准照省會首府之例改爲調缺者有福建之泉州府廣東之潮州府厯稽成案凡知府請旨之缺卽不得仰邀

特旨遽改題缺亦經屢奉部議准改調缺今贛州府雖非海疆以地方情形而論處處與閩粵接壤匪徒出沒靡常實非尋常腹地可比合無仰懇

天恩准將贛州府員缺照省會首府之例改爲調缺其所遺之缺仍請

旨簡放以符定制如此量爲變通庶要缺可期得人而額缺仍無窒礙現在贛州府知府何維墀丁憂業經臣

吳文鎔照例

題請開缺請

旨簡放如蒙

俞允所有贛州府一缺卽改由臣等於通省知府內遴員

奏請調補其所遺之缺卽以

簡放之員請補據瀋臬兩司會詳請

奏前來謹合詞恭摺具

奏伏乞

皇上聖鑒訓示謹

奏道光二十六年八月初五日奏奉

硃批另有旨欽此

覆奏訪查邪匪片

再臣前准軍機大臣密寄道光二十六年六月十六日奉

上諭御史蘇學健奏訪聞不法匪徒術詭幼孩一摺據稱此等匪徒起於浙江沿及江蘇等處於路上拋置食物並於果餅鋪內售賣食物時暗中更換小兒食之卽斃斃後潛取腦腎心肝流傳漸廣等語果如該御史所奏邪匪爲害地方關係匪淺著各按摺內所指情形選派員弁嚴密訪查務期有犯必獲並訊明此術起自何人意欲何爲按律懲辦以除邪慝而衛民生等因欽此嗣又接准軍機大臣字寄七月二十四日奉

上諭前有人奏近多匪徒迷毒幼孩一案當有旨令各該督撫飭屬嚴拏究辦矣朕思此等匪徒行蹤詭秘到官熬審受刑何肯供吐實情倘承審官畏難遷就且爲規避處分起見勢將使匪徒等倅逃法網著各該督撫務卽督飭所屬於拏獲到案之犯悉心研鞫不得意存消弭化大爲小以祛邪慝而靖地方等因欽此伏查臣

於閏五月間風聞民間相傳有邪匪以藥術迷害幼孩之說當以所言雖荒渺無據未可輕信但事屬殘害民生若果實有此等邪匪斷不可不行拏究卽經密飭各地方官嚴密訪緝務期有犯必獲仍不得稍涉張惶驚

卷之三
三
感民心嗣兩次欽奉

諭旨復經欽遵諱飭各屬嚴密訪查去後頃據各屬稟覆均查無前項匪徒毒害之事並據臨川萬年鄱陽星子清江安福等縣稟報據鄉民獲送形跡可疑之黃連興黃紹義何魁羣謝輝九龔鳳吉劉廖氏等亦皆訊係賣藥貿易之人並無爲匪不法內龔鳳吉劉廖氏等二起因其供涉疑似復經臣提省委員復審根究來厯住址均屬明白並有原籍鄰族地保指證實非邪匪均經分別取保開釋現在浮言漸息臣仍飭屬鎮靜訪察勿因事無實據致涉大意亦不得稍事張惶致滋波累以

仰副

聖主除害安良至意所有江西境內現在查無前項那
匪及辦理緣由臣謹附片覆

奏伏乞

聖鑒謹

奏道光二十六年九月二十一日奏奉

硃批知道了欽此

籌補缺漕摺

奏爲遵

旨籌補緩缺漕糧分別起解搭運緣由恭摺

奏疏

聖鑒事竊臣接准戶部咨以江西省徵收漕糧雖上屆三年內有兩年全漕起運與江浙等省歲有短少不同惟本年起運數目究係比較上屆三年均屬有減無增奏請

勅下迅卽設法補運等因奉

旨依議欽此欽遵轉行遵照去後茲據督糧道朱慶會同藩司費開綏署鹽法道劉熾昌籌議詳請具

奏前來臣查江西省本年起運道光二十六年正副漕米比較二十三二十五全運之年固屬短少卽比較二

十四年分漕糧亦少運米六萬餘石緣上年夏秋缺雨
收成歉薄經臣委員勘實奏懇

恩施緩徵今准部咨行令設法補運自應遵照辦理臣

與司道等再四熟籌現在江西地方因上年受旱較廣
糧價已昂若動項採買深恐有妨民食且司庫亦多支
綃動輒常平倉穀亦恐買補稽延有關儲備查各官捐
輸米石先經臣廣爲勸諭現已據陸續報捐米一萬餘

石業經派幫帶運因思出運軍船各丁應得食米向有
贏餘除去貧疲船丁外計每船仍可收買二三十石約
可收買米一萬石於各丁口食尚有敷餘惟查收買軍

船七成扣半等米每石例給價銀一兩九錢現在江西
市價增昂若照案核給該丁等未免偏枯應請每石酌
加一錢給銀二兩免其扣平亦毋須另給水腳較之採
買市米另加運費者所省實多卽經飭據藩司籌動庫
銀二萬兩移交糧道按數收買仍交各船帶運飭造冊
結詳咨以上二項共可得米二萬餘石然爲數尙屬無
多復查得鹽道所管鹽義倉穀本係臣衙門裁革鹽規
充公項下奏明分年動支買穀存貯各府現計其存穀
十二萬餘石除南贛兩府地方緊要仍須酌留外其餘
可動碾穀八萬石計可得米四萬石以資補運將來無

庸動司庫之項買還既可節省

帑金而於本省民食倉儲仍無妨礙惟各幫軍船現已
陸續開行勢難截留灑帶其減歇軍船既修船需時而
船水等久已星散亦難招集恐誤限幫渡黃之期應
卽另籌起運查江蘇省現在推廣捐米事例籌辦海運
此項米解往搭運事屬便易現已飭令鹽道飛飭各府
將鹽義倉穀核數動撥另由臣遴委委員分投雇募民
船押運赴蘇解交上海道驗收兌給海船搭運其由西
運蘇水腳卽按照程站給發至海運腳價應俟蘇省核
定知照後由江西籌款解往將來卽與收買旗丁米價

一併作正開銷除分飭各司道遵照並咨商江蘇督撫
臣檄飭上海道預爲雇募商船俟西省米石解到即可
兌交搭運北上外所有設法籌補米石及分別起解搭
運緣由理合恭摺具

奏伏乞

皇上聖鑒訓示謹

奏道光二十七年二月十五日奏奉

硃批戶部知道欽此

籌補京倉米石改由糧船灑帶摺

奏爲籌補京倉米石不敷原奏之數並改由糧船灑帶

北上以歸簡便而節費用恭摺

奏祈

聖鑒事竊照江西省起運新漕比較上三屆有減無增
經臣遵

旨籌補除各官捐輸及收買幫丁餘米共二萬餘石派
幫搭運外擬再動碾鹽義倉穀八萬石計可得米四萬
石因各幫軍船業已陸續開行請運赴江蘇上海另雇
海船兌運北上緣由當經

奏奉

硃批戶部知道欽此查先據南康九江二府暨南昌新

建二縣稟報將存貯鹽義倉穀儘數動碾共得米三萬三千石其南贛二府倉穀本擬各酌碾數千石湊用適自二月下旬以來久晴不雨早秧尙未插齊糧價日增臣酌核目前情形南贛地方緊要未敢拘泥原奏致缺儲備是以只就現報米數飭令起運所有較原奏少米七千石係因時酌量存留南贛倉穀未經動碾至海運章程現在尙未准江蘇督撫臣咨照而本省糧船因前值雨少灘多節節磨淺甫報渡湖尙未出境若將此項米石雇船趕赴江蘇儀徵縣老虎頸一帶地方乘糧船起卸幫木暫泊之時卽行兌交搭運赴通甚爲簡便當

經飭據糧道查稟本年起運軍船五百十五隻以三萬三千石米核計每船約加裝米六十餘石尙不致形笨重惟幫丁將來過閘起剝費用在所不免應請每石酌給耗米折銀二錢水腳銀三錢五分庶免幫丁藉口暗累致有貽誤臣查係實在情形且較之另雇海船搭運者所省已多臣現已飭令藩司分起委員將前項米石裝運趕赴下游交糧船帶運北上並酌動庫項將腳耗發給事竣核實報銷除咨明江蘇督撫臣漕運總督倉場侍郎暨戶部查照外所有起運米石不敷原奏之數並改由糧船搭運緣由理合恭摺具

奏伏乞

皇上聖鑒再各處樣米均經臣抽調查驗一律乾潔惟各倉貯穀久暫不等顏色未能畫一合並陳明謹

奏道光二十七年三月二十七日奏奉

硃批戶部知道欽此

吳文節公遺集卷十四目錄

奏議

覆奏嚴禁幫倉浮費摺

擎獲崇義長甯二縣匪犯摺

審辦長甯縣會匪摺

擎獲湖南匪犯片



吳文節公遺集卷十四

男養原謹編

奏議

覆奏嚴禁幫倉浮費摺

奏爲遵

旨覆奏仰祈

聖鑒事竊臣先後接准戶部咨議覆御史朱昌頤條奏
漕務積弊一摺請將幫弁及地方諸費

勅下有漕各督撫按照各該處現時費用款目銀數一
體嚴查悉心酌核妥議章程請

旨定奪又議覆給事中雷以誠奏請飭有漕各省查照
山東裁減旗丁津貼公項之案一律辦理一摺以各省
情形不一津貼多寡有差應由各該督撫通盤籌畫不
必拘定十分之三致滋窒礙等因奏奉

諭旨依議欽此均經恭錄轉行欽遵去後茲據督糧道
朱璣會同布政司費開綬以查無前項諸弊詳請覆
奏前來臣查江西省有漕五十廳州縣起運正副米七
十六萬有奇糧額較輕津貼亦少非如蘇浙之賦重費
多者可比且運道既遠丁力又疲亦與山東之丁殷路
近者不同前因州縣浮收旗丁勒索曾於嘉慶四年及

十四五等年疊次

奏明將旗丁所得所用各項陋規十五款分別裁革飭禁載入漕運則例永遠遵行在案近年復嚴切查禁並無踵事加增之處旗丁既無多索官民亦屬相安其中間有閩漕之案多係地棍刁徒藉詞斂錢肥己百姓或愚而爲其所脅地方官或措置失宜果能經理得人隨案懲辦自可仍循舊轍並非浮徵病民致釀事端也今若將幫丁及地方不得已諸費明列款目議立章程請旨定奪是以本非例給之銀並無額定之項一一懸爲令甲不特事多窒礙抑且跡類加徵在昔申明例禁猶

慮不肖之員暗中需索今若明定章程更恐有所影射
例外浮加臣就江西情形再四籌思與其紛更而事有
未便不若循舊而察核加嚴惟有嚴飭所屬凜持

功令遵循舊章旗丁則責成糧道不准格外絲毫多索
地方官則責成司道暨各知府隨時查察不准格外絲
毫多收以期上下相安漕運無誤至江西間遇水旱偏
災均經委員確勘

奏請展緩非因州縣規避交糧費重捏報災歉此後仍
當加意慎重儻有捏災請緩等弊亦卽從嚴叅辦仰副
聖主肅清政之至意所有漕務現時費用款目毋庸

明立章程緣由理合恭摺覆

奏伏乞

皇上聖鑒訓示謹

奏道光二十七年四月二十日奏奉

硃批另有旨欽此

拏獲崇義長甯二縣匪犯摺

奏爲江西崇義長甯二縣先後拏獲教犯會匪多名現在提省究辦地方均極安謐先將獲犯大概情形恭摺奏祈

聖鑒事竊查江西南安府所屬地方多與湖南廣東連

界贛州府所屬地方則多接壤廣東福建每有習教拜會情事歷經查辦在案臣恐該匪等萌孽潛滋與藩臬

兩司不時嚴飭各屬認真訪察以期有案必破有犯必

懲茲據南安府暨崇義縣稟稱先經該縣營訪聞境內

與湖南桂陽縣交界地方有喫齋習教之人選派兵役

嚴密緝拏卽據捕獲楚潮泗等二十餘名並起獲經簿

等件訊據楚潮泗供認拜湖南人王成金爲師習三乘

教傳徒斂錢並無別項不法嗣經南安府親往督拏續

獲廖文華等十餘名供情約略相同亦有止認喫齋者

查閱經簿尙無違悖字樣此崇義縣拏獲教犯之大略

也又據贛州道府稟稱據長甯縣稟先經訪聞境內各
堡多有匪徒結盜拜會並有外來齋匪假託相面占課
之術形跡可疑正在會營掩捕間於五月二十九日傳
聞匪徒有聚眾劫搶之信卽經會同城守營把總分撥
兵役前往查探於五里亭盤獲身帶短刀之謝詞華一
犯將其押解進城詎隨後卽有百數十人各執刀械蜂
擁追至意欲入城經把總德全開放鳥槍當時擊斃一
匪餘匪亦卽紛紛逃散因該縣汎守兵數無多恐不敵
查拏稟請添撥等情該道李本仁接據稟報卽商同南
贛鎮臣德坤檄飭游擊穆克登布酌帶標兵會同贛州

府知府周玉衡星夜馳往搜捕臣接稟後復飭該道親

往督辦嗣據該道府等稟稱先後馳抵該縣沿途察看

居民並無被搶之家詢據官民僉稱匪徒自逃散後並

未復至卽經會督營縣陸續獲犯凌成潔等六十餘名

訊據供稱伊等向結有關爺會不拘人數隨時結拜亦

有年少居首者五月間聞有外來齋公董言台羅普章

到在逃之謝詞封家往來旋經謝詞封並在逃之潘蛇

羅四來約小的們劫搶因謝詞華被獲是以來城希圖

奪犯不料被官人擊斃一人均各逃散等語現在該道

業已旋署酌留兵丁數十名飭令贛州府在彼督率搜

緝逃匪餘均撤回歸伍此長甯縣拏獲會匪之大略也

臣查齋匪會匪名目雖異均足爲人心風俗之害崇義

案犯旣有習教傳徒之事所供僅止圖斂錢文已難憑

信而長甯案犯膽敢糾眾圖劫則其平日結盟拜會更

難保別無不法之事現供顯有狡飾所有案內首要各

犯必須分別嚴辦按名就擒提同研究確情核實懲辦

方足以儆邪慝而靖閭閻臣已將楚湖泗等供出之湖

南各犯飛咨湖南撫臣一體飭屬嚴拏並將謝詞封等

首要各犯通行嚴飭各屬派委員弁改裝購線於本境

鄰界搜緝偵緝務期悉數弋獲勿使一名漏網以仰副

聖主除莠安良之至意除將已獲各犯先行提省督司嚴審是否尚有不軌重情另行分別究辦外所有崇義長甯二縣查拏教犯會匪大概情形及地方安謐緣由謹繕摺具

奏伏乞

皇上聖鑒謹

奏道光二十七年八月初四日奏奉

硃批所辦好另有旨欽此

審辦長義縣會匪摺

奏爲匪徒結盟拜會糾眾圖劫提省審明按例定擬恭

摺

奏祈

聖鑒事竊

臣

前據贛州道府稟報會營拏獲長甯縣匪

犯凌成灤等究出與逸犯謝詞封等結拜關爺會糾眾

搶劫因夥犯謝詞華被獲欲行入城奪犯等情當經嚴

札飭拏首夥各逃犯務獲一面飭將已獲各犯解省審

辦一面先將現辦大概情形與崇義縣訪獲另案教匪

楚潮泗等一案恭摺具奏於道光二十七年九月十四

日奉到

硃批所辦好另有旨欽此同日又准軍機大臣字寄道

光二十七年八月二十四日奉

上諭吳文鎔奏擊獲教匪會匪提省審辦一摺所辦好
江西南安贛州兩府地方界連湖南廣東福建每有匪
徒習教拜會傳徒等事甚或糾眾圖劫爲害地方更難
保無另有不軌重情必應嚴密擒拏澈底根究以期淨
絕根株方無貽患著該撫督同臬司先將現獲各犯嚴
行訊辦該犯楚潮泗等供止喫齋斂錢斷難憑信所供
拜湖南人王成金爲師習教並謝詞華等結盟拜會膽
敢聚眾希圖奪犯尤屬不法已極務卽飛咨湖南一體
飭屬嚴拏研究確情覈實懲辦至已獲案人犯必應多

方詳鞠毋令任意狡飾致有不實不盡在逃各逸犯著卽通飭各屬並咨會鄰封毋分畛域一體嚴密搜拏務期悉數就獲不留餘孽是爲至要將此諭令知之欽此等因遵

旨寄信前來查首犯謝詞封從犯僧道禪等業經該管道府督飭各該縣兵役先後弋獲陸續解省經臣督同陞任臬司溫子巽發委南昌府審辦茲據署南昌府知府蔣啟敷以首犯謝詞封及涂升凌祥賢趙拔富潘啟連潘汝佳范開禮黃潮洮僧海渡等九名均已在監在途病故將凌成潔等八十四犯嚴審明確按例議擬由

新任臬司陸元烺審解到臣聲明楚潮泗等習教傳徒一案現在嚴究確情容俟審定後另案辦理經臣親提

研鞠緣謝詞封籍隸長甯縣與現獲之凌成潔僧道禪

已被擊斃之易泳盛在逃之董言台素識交好董言台

不茹葷酒稱爲齋公道光二十七年正月不記日期凌

成潔僧道禪易泳盛前赴謝詞封家探望謝詞封談及

贛州一帶向有天地會名目同會中人彼此幫扶可以

免人欺侮結夥訛詐可以得贓分用起意令凌成潔等

各爲糾人訂期結拜並因天地會歷奉拏辦恐致張揚

敗露遂改爲關爺會以圖掩飾凌成潔等允從臣分投

糾得已獲之謝球生保王得珍林遇椿潘發邱繼宗凌
得潔胡雲芳謝名貴胡朋貴潘貓公三謝詞華獲案病
故之涂升凌祥賢趙拔富潘啟連潘汶佳范開禮黃湖
沈僧海渡在逃之潘蛇羅四劉良老五湯石金妹潘蛇
羅二羅普章等二十四人訂於是月二十六日赴謝詞
封家會齊至日凌成潔等與謝球生保等畢集謝詞封
用紅紙寫立關爺牌位又做成布旛五面每面上寫忠
義堂三字插入米斗之中買備香燭雞酒供奉謝詞封
開寫入會人姓名已畢與凌成潔等同向神牌跪拜不
序年齒自居爲總老大令凌成潔僧道禪易派盛各爲

散老大其餘依齒序列謝詞封站立上首口念有忠有
義毋得欺兄騙弟如有欺騙立見消亡又此後總散老
大有事呼喚凡我同會不許不至等誓語誓畢宰雞取
血滴酒同飲並約以同會中人各以髮辮左盤爲記謝
球生保等聽受給與謝詞封錢或一百文或二百文而
散以上現獲之謝球生保等及在逃之潘蛇羅四等二
十四犯平日均游蕩爲匪素非善類是年五月間謝詞
封因會黨不多難於助勢復囑凌成潔僧道禪易泳盛
廣爲糾約凌成潔等又先後誘允已獲之曹二酉范發
賴胡得盛潘幅堂凌三陽林沅羅宣李善壽唐喜舜王

滿謝詞仁湯爛眼五胡李保謝過命猪李沾沅李含秀
潘二美胡慶祖謝開粦華汶慶曹鍋水桶張老四陳邊
三范成瀧凌開灤凌連涓李瑞成湯運庭胡開明潘其
漢楊丟四潘步賢劉亮何鍾傳萬凌連灤潘廣二謝名
受凌玉潘鴉鵠賴作灤李瑞庭凌汶發凌鬧埽五凌
良發凌貓七謝老三彭耀先湯接華王得坤湯得能王
振升方書潤王陰欄猪胡觀音保涂連開潘賤九凌瑞
松邱幅賢潘啟西劉椿香王亞三彭舉長何祿古凌爛
眼潘禾必五湯得喜潘啟富李益成趙拔盛胡成幅潘
汝良獲案病故之雷祖灤等七十二人於是月十四日

在謝詞封家相近之仙娘空廟照依前式結拜謝詞封凌成潔僧道禪易涿盛仍自居爲總散老大其餘依齒序列曹二酉等各給謝詞封錢或一百文或數十文不等以上曹二酉等七十二犯均係鄉愚無知平日並無爲匪情事二十七年五月二十七日謝詞封因會夥眾多起意搶劫並因長甯城外貧戶居多欲行入城肆搶正與凌成潔僧道禪易涿盛在家商議適董言台走至聽聞詢悉前情從旁慇懃並稱伊當糾人入夥與謝詞封等約定日期而去此後董言台並未復至亦無被糾入夥之人是月二十九日謝詞封傳集會眾告以入城

搶劫情由謝球生保等當未允許因被謝詞封用言嚇逼無奈允從謝詞封先令謝詞華身藏短刀往探城內有無準備自與凌成灤僧道禪易涿盛率領謝球生保等各帶刀械分起潛進而謝詞華行抵城外五里亭地方正值該縣先期訪聞會營督帶兵役出城查拏將謝詞華盤獲押送進城謝詞封聞知喝眾追趕甫至城邊河岸曹二酉等畏罪陸續逃散凌成灤僧道禪易涿盛謝球生保王得珍林遇椿潘發邱繼淙凌得灤胡雲芳謝名貴胡朋貴潘貓公三涂升凌祥賢趙拔富潘啟連潘汶佳范開禮黃潮洸僧海渡潘蛇羅四劉良老五湯

石金妹潘蛇羅二羅普章各執刀械隨同謝詞封欲行入城將謝詞華奪回該縣把總德全見勢兇猛放槍抵禦中傷易沫盛身死謝詞封等始各畏懼逃逸該縣因長甯汎守兵數無多不敷查拏稟經該道李本仁商同南贛鎮臣德坤檄飭游擊穆克登布酌帶標兵會同贛州府知府周玉衡馳往搜捕並經臣札飭該道親往督辦嗣據陸續報獲凌成灤等六十餘犯訊取大略供情具稟經臣一面奏

聞一面飭令嚴拏解審續據獲到首犯謝詞封等並前獲之凌成灤等先後押解來省督司發委審辦茲據訊

擬由司審轉前來

臣

恐該犯等所供並無謀爲不軌重

情顯係任意狡飾且恐所糾黨羽尚不止此數再四究
詰並加以刑嚇各犯堅執如前委無另犯不法別案及
更有聽從入會之人案無遁節查例載閩粵等省不法
匪徒潛謀糾結復興天地會名目搶劫拒捕者首犯與
曾經糾人之犯俱擬斬立決其並未轉糾黨羽或聽誘
被脅素非良善者俱擬絞立決如平日並無爲匪僅止
一時隨同入會者俱發遣新疆酌撥種地當差等語此
案謝詞封因贛州一帶先有天地會名目輒敢起意糾
人結拜因天地會屢奉拏辦另立會名希圖掩飾該犯

聚至百人之多不序年齒自爲總老大又復起意入城圖劫及至先往探信之謝詞華被獲猶敢率眾進城奪犯實屬目無法紀凌成潔僧道禪易泳盛先爲謝詞封糾誘多人入會結拜繼復聽從入城圖劫並隨同奪犯實屬同惡共濟雖圖劫未成而事屬已行難容寬貸自應按例問擬謝詞封凌成潔僧道禪易泳盛四犯均合依閩粵等省不法匪徒復興天地會名目搶劫拒捕者首犯與曾經糾人之犯俱擬斬立決例擬斬立決謝詞封聚眾百人起意入城行劫應從重加擬梟示已於取供後在監病故照例戮屍傳首犯事地方懸竿示眾易

沫盛已被擊斃應毋庸議謝球生保等聽糾人會隨同
圖劫奪犯未成訊明平日或犯搶竊或犯訛詐均非良
善亦應按例問擬謝球生保王得珍林遇椿潘發邱繼
淙凌得潔胡雲芳謝名貴胡朋貴潘貓公三謝詞華涂
升凌祥賢趙拔富潘啟連潘汶佳范開禮黃潮沈僧海
渡十九犯均合依並未轉糾黨羽或聽誘被脅素非良
善者俱擬絞立決例擬絞立決涂升凌祥賢趙拔富潘
啟連潘汶佳范開禮黃潮沈僧海渡業已在監在途病
故均毋庸議曹二酉等僅止被誘入會其脅從行劫中
途逃散尙知畏法且平日並無爲匪情事亦應按例問

擬曹二酉范發賴胡得盛潘幅堂凌三陽林沅羅宣李
善壽唐喜辦王滿謝詞仁湯爛眼五胡李保謝過命猪
李沾沅李含秀潘一美胡慶祖謝開辦華汶慶曹鍋水
桶張老四陳邊三范成灑凌開灑凌連涓李瑞成湯蓮
庭胡開明潘其漢楊奕四潘步賢劉亮何鍾傳萬凌連
灑潘廣二謝名受裝作王潘鴉鵠賴作灑李瑞庭凌汶
發凌闇掃五凌良發凌貓七謝老三彭耀先湯接華王
得坤湯得能王振升方書潤王陰欄猪胡觀音保涂連
開潘賤九凌瑞松邱幅賢潘啟西劉椿香王亞三彭舉
長何祿古凌爛眼潘禾必五湯得喜潘啟富李益成趙

拔盛胡成幅潘汶良雷祖潔七十二犯均合依平日並無爲匪僅止一時隨同入會者俱發遣新疆酌撥種地當差例俱發遣新疆酌撥種地當差雷祖潔業已在途病故應毋庸議以上各犯內有供稱親老丁單者係屬會匪毋庸查辦留養有弟兄同犯者亦不作一家共犯諭謝詞封所書神脾名單及所製布旛訊已燒燬請免追起其所得各犯錢文身死勿徵謝詞封屍棺交保看守餘犯屍棺分別飭關屍屬領埋謝詞封等在監在途病故刑禁解役人等訊無凌虐情弊應毋庸議各該犯均係帶病進監身故管獄官例無處分逸犯潘蛇羅四

等飭緝獲日另結再此案結盟拜會匪犯係各該營縣訪聞拏獲究辦所有失察職名邀免開叅除將崇義縣教匪楚潮泗等一案俟審定後容臣另行擬辦並將此

案全案供招送部外所有審擬緣由理合恭摺具

奏伏乞

皇上聖鑒勅部核覆施行謹

奏道光二十七年十月二十五日奏奉

硃批刑部速議具奏欽此

拏獲湖南匪犯片

再臣按准軍機大臣字寄道光二十七年九月初九日

奉

上諭本日據裕泰陸費瑔奏湖南臨武常甯二縣訪獲
糾眾拜會首從各犯一摺又片奏桂陽縣拏獲教犯訊
出王存真等傳徒習教蹤跡飛咨廣東江西一體飭拏
並接准江西來咨通飭嚴密偵捕等語此案臨武常甯
等縣營先後拏獲匪犯一百十餘名之多訊據供認結
盟拜會且刊刻字帖沿襲悖逆語句分途傳布必應嚴
密拏辦以淨根株耆英吳文鎔等接奉此旨務卽按照
犯供並詳覈裕泰陸費瑔咨文選派幹員前往各該處
密行查訪拏辦以懲邪匪而靖地方等因欽此欽遵查

得江西崇義縣訪獲齋匪楚潮泗等一案核與湖南桂陽縣所獲齋匪廖宗箕等係屬一起卽經彼此知會嚴拏黨羽現在將各犯提省委員審訊一俟審得確情再行按擬具奏其與湖南臨武常甯二縣匪犯唐帽通等有無牽涉未准湖南撫_臣移知當經飛咨查詢卽准抄錄原奏摺稿並聲明與江西之案無涉移咨到_臣_臣核其犯供情節及徒黨姓名與楚潮泗等所供並無牽涉自係另屬一起但湖南與江西連界彼案逃犯難免不聞拏潛竄入境先經_臣通飭各屬選派員弁嚴密堵拏卽據吉南贛甯道李本仁飭據委員候補縣丞姚德普

在廬陵縣地方會同各縣營兵役將湖南案內首要之黃壽松一犯拏獲解省委訊據供伊從前未到過江西在家時曾收江西人董時詒爲徒現因在湖南與張老二蔣萬成等聚眾結盟地方官查拏嚴緊是以逃到江西等語核與湖南原奏犯供大略相同查該犯在江西旣未有案無可審辦自應解往楚省歸案辦理除已飭司委員將黃壽松一犯解交湖南歸案訊辦外仍一面嚴飭各委員分赴各府縣務將在逃匪犯不分畛域一體實力搜捕不使稍留餘孽以靖地方理合將先經拏獲湖南要犯黃壽松及現在偵緝各逸匪緣由附片具

奏伏乞

聖鑒謹

奏道光二十七年十月二十五日奏奉

硃批知道了欽此

吳文節公遺集卷十五目錄

奏議

審辦崇義縣齋匪摺

審辦續獲長甯縣會匪摺

吳文節公遺集卷十五

男養原謹編

奏議

審辦崇義縣齋匪摺

奏爲崇義縣匪徒習教傳徒斂錢惑眾遵
旨訊明定擬恭摺覆

奏仰祈

聖鑒事竊臣前據南安府暨崇義縣稟報先後會同營
汛及各該地方文武拏獲齋匪楚潮泗等三十餘名究
出楚潮泗係拜湖南人王成金爲師習學三乘教傳徒

斂錢等情當經委員前往搜捕並飛咨湖南撫臣一體飭屬嚴拏在逃首從各犯務獲及飭將已獲各犯解省審辦一面先將大概情形與長甯縣匪徒謝詞封等結盟拜會糾眾圖劫一案恭摺具

奏於道光二十七年九月十四日奉到

硃批所辦好另有旨欽此同日又承准軍機大臣字寄道光二十七年八月二十四日奉

上諭吳文鎔奏拏獲教匪會匪提省審辦一摺所辦好江西南安贛州地方界連湖南廣東福建每有匪徒習教拜會傳徒等事甚或糾眾圖劫爲害地方更難保無

另有不軌重情必應嚴密擒拏澈底根究著該撫督同
臬司先將現獲各犯嚴行訊辦該犯楚湖泗等供止與
齊斂錢斷難憑信所供拜湖南人王成金爲師習教務
卽飛咨湖南一體飭屬嚴拏懲辦至已獲案人犯必應
多方詳鞠毋令任意狡飾致有不實不盡在逃各逸犯
著卽通飭各屬並咨會鄰封毋分畛域一體嚴密搜拏
務期悉數就獲不留餘孽是爲至要將此諭令知之欽
此等因遵

旨寄信前來欽遵查得長甯縣匪徒謝詞封等一案業
經委員審明經臣提訊議擬具

奏在案此案該犯楚潮泗等同續獲各犯先經該府縣
陸續解省經前司溫予異發委南昌府等審辦茲據南
昌府知府吳清皋南昌府同知蔣啟敷以案內訊止被
誘辟齋並未入教之余榮和等十名赴縣自首改悔開
齋均經各該縣訊取族鄰供結保釋所有從犯張開點
鍾傳第李楨祥傅傳通鍾興芳鄒學先朱庚古張堂灝
沈盛標楚喻義李心本楚金題鄒雲隴等十三名先後
在途在押患病及帶病進監身故廖文華一名訊供另
拜湖南人徐旺珍爲師習教與湖南桂陽縣拏獲教犯
事有牽涉解赴楚省歸案審辦將楚潮泗等二十五犯

嚴審確情按例議擬由新任臬司陸元烺審解到臣

親提研鞫緣楚潮泗籍隸崇義縣先未爲匪道光二十七年正月間楚潮泗與其兄楚紹芳赴湖南貿易與在逃之桂陽縣人王成金卽王存真會遇閒談王成金談及習學三乘教可以獲福延年又可斂錢使用教內有引恩證恩天恩子恩眾生等名目引恩戴用道冠道袍傳授經卷證恩可以傳徒其餘天恩子恩眾生不過茹素念經又有上中下三蓋經牌領得上蓋中蓋者亦可傳徒伊係引恩如楚潮泗願習伊當傳授等語楚潮泗聽信卽拜王成金爲師王成金傳授口誦無生老母呪

語並三皈五戒派名證恩所謂三皈者皈佛皈法皈僧
五戒者一戒殺生二戒偷盜三戒邪淫四戒酒肉五戒
妄語並給與黃紬中蓋經牌一個經卷小書三本楚湖
泗勸令楚紹芳亦拜王成金爲師派名子恩楚湖泗送
給王成金香錢二千文而散是年夏間楚潮泗聞知同
教之廖宗箕在湖南桂陽縣地方行教獲利亦起意傳
徒斂錢遂自稱三乘教首將紅紙刷印上蓋中蓋下蓋
經牌多張先後誘允已獲之李家動彭卿標賴家興張
孟沈朱宏浪劉通沅朱帮瑞鄒學株余觀妹李灝宦解
楚審辨之廖文華在逃之劉化帮楚百荷胡善哉胡善

者十五人拜師入教李家動等各送香錢一二百文不等楚湖泗每人各給紅紙下蓋經牌一張傳授口誦無生老母呪語派名眾生鄒學株余觀妹李灝宦並未送錢僅派眾生名目未經給牌傳呪其中劉通沅朱帮瑞楚百荷胡善哉胡善者五人均係楚紹芳引進楚湖泗又誘令余榮和吳懋標李鍾衡李正機彭卿塘鄧亦九鄒繼華陳年太張克順胡宗連持齋邀福未經入教又在逃之羅友書李思義胡宗忻李積玉劉得彰朱步月范普生七人亦習三乘教其拜何人爲師無從詢實羅友書傳已獲之余濟楨余興齋並獲案病故之張開點

鍾傳第四人李思義傳已獲之楚學曾並獲案病故之
李楨祥傳傳通鍾興芳四人胡宗忻傳已獲之陳明遠
余榮梅並獲案病故之鄒學先三人李積玉傳已獲之
劉菖耀劉菖洸並獲案病故之朱庚古張堂灝沈盛標
五人劉得彰傳已獲之鍾高興張新還並獲案病故之
楚喻義李心本四人朱步月傳已獲之鄧翼來並獲案
病故之楚金題二人范普生傳已獲之張興漋一人各
令拜師入教派名眾生因未送錢均未得受經牌呪語
又已獲之鍾翠興楚湖注並獲案病故之鄒雲隴三人
平日均因患病茹素消災不知邪教名目經該縣府訪

聞查拏稟報經臣一面奏

聞一面委員前往搜捕先後弋獲楚潮泗等押解來省發委審辦茲據訊擬由司審轉前來臣以該犯等所供僅止習教傳徒斂錢惑眾並無另犯不軌重情殊難憑信且恐所傳徒眾尚不止此數親提再四研鞠併加以刑嚇該犯等堅執不移案無遁飾應卽議結查例載傳習白陽等邪教習念荒誕不經呴語拜師傳徒惑眾者爲首擬絞立決爲從年未逾六十及雖逾六十而有傳徒情事俱改發回城給大小伯克及力能管束之回子爲奴等語此案楚潮泗先拜湖南人王成金爲師入三

乘教習念經呪得受經牌經卷嗣聞同教廖宗箕在楚省行教獲利起意傳徒斂錢自稱教首先後誘令李家動等十五人拜伊爲師實屬藐法自應按例問擬楚湖泗一犯合依傳習白陽等邪教習念荒誕不經呪語拜師傳徒惑眾者爲首擬絞立決例擬絞立決楚紹芳等聽從拜師入教習念呪語得受經牌卽屬爲從而楚紹芳又引入入教亦與傳徒無異且均年未六十亦應按例問擬楚紹芳李家動彭卿標賴家興張孟洸朱宏浪劉通沅朱帮瑞八犯合依爲從年未逾六十及雖逾六十而有傳徒情事俱改發回城給大小伯克及力能管

束之回子爲奴例俱發同城給大小伯克及力能管東
之回子爲奴雖係南贛匪徒例應加等第罪至爲奴無
可復加應毋庸議鄒學株等聽從拜師入教派名眾生
並未習念經呪亦未得受經牌與李家動等業經傳習
者有間自應酌減問擬鄒學株余觀妹李灝宦余濟楨
余興馨楚學曾陳明遠余榮梅劉菖耀劉菖洸鍾高興
張新還鄧翼來張興漋張開點鍾傳弟李楨祥傳傳通
鍾興芳鄒學先朱庚古張堂灝沈盛標楚喻義李心本
楚金題二十六犯應請於李家動等爲奴罪上酌減一
等擬杖一百徒三年內劉菖耀劉菖洸二犯籍隸泰和

事犯南安餘俱南贛匪徒照例各於徒罪上加一等擬杖一百流二千里張開點錄傳弟李楨祥傳傅通鍾興芳鄒學先朱庚古張堂灝沈盛標楚喻義李心本楚金題業經病故應毋庸議餘俱發配分別折責安置以上各犯俱遇

赦不赦有供稱親老子單者毋庸查辦留養有弟兄同犯者亦不作一家共犯論鍾翠興楚潮注並獲案病故之鄒雲龍訊止茹素消災不知邪教名目例得免議余榮和吳懋標李鍾衡李正機彭卿塘鄧亦九鄒繼華陳年太張克順胡宗連先經被誘茹素旋卽改悔赴縣呈

首開齋業經各該縣訊明取具族鄰保結釋放毋庸再
議張開點等在途在押在監病故刑禁解役人等訊無
凌虐情弊亦毋庸議犯係帶病進監身故管獄官例無
處分楚湖泗得受香餞訊無確數免其著追廖文華因
與湖南拏獲教匪事有牽涉解歸質訊應歸彼案擬結
逸犯王成金等咨行嚴緝獲日另結再此案齋匪係該
縣府自行訪聞會營拏獲究辦所有失察文武職名邀
免開送除將全案供招咨部起獲經牌書本等件咨送
軍機處備查外所有審擬緣由理合恭摺覆

奏伏乞

皇上聖鑒勅下法司核覆施行謹

奏道光二十七年十一月二十六日奏奉

硃批刑部速議具奏欽此

審辦續獲長甯縣會匪摺

奏爲續獲長甯縣匪徒拜會圖劫案內逸犯提省審明
定擬恭摺

奏祈

聖鑒事竊照長甯縣匪徒謝詞封等結拜天地會糾眾
搶劫一案經臣提審明確按例議擬具

奏在案續據長甯縣將逸犯劉良老五獲案並究出縣

民胡運洪亦係同會一併弋獲稟經提省發委審辦茲據委員南昌府知府吳清皋南昌府同知蔣啟敬訊明讓擬由臬司陸元烺審轉前來臣親提研鞠緣劉良老

五胡運洪籍隸長寧縣與已獲擬辦之謝詞封等互相

認識劉良老五平日游蕩爲匪素非善類胡運洪先未

爲匪道光二十七年正月二十六日劉良老五聽凌成

潔等糾約與已獲之謝詞生保等在逃之潘蛇羅四等

二十四人赴謝詞封家結拜關爺會卽天地會謝詞封

自爲總老大開寫入會人姓名與凌成潔劉良老五等

同向神牌跪拜宰雞取血滴酒同飲約以同會中人各

以髮辮左盤爲記並宣示此後老大有事呼喚不許不至等誓語劉良老五聽受給與謝詞封錢二百文而散是年五月間劉良老五另誘胡運洪及在逃之邱大楊二照依前式在家拜會一次劉良老五自爲老大餘俱依齒序列是月二十九日謝詞封起意入城搶劫傳集會眾告知情由先後起行劉良老五當邀胡運洪並邱大等同往胡運洪等先未允許劉良老五用言嚇逼無奈從行因先往之謝詞華被該縣管盤獲進城謝詞封率眾追趕甫至長甯縣城邊河岸曹二酉等先行逃散胡運洪等亦卽逃回劉良老五等各執刀械隨同謝詞

封欲行入城將謝詞華奪回被該縣把總德全放槍將
易泳盛擊斃始各畏懼逃逸經該縣稟經鎮道委員帶
兵會同該府馳往搜捕並經臣札飭該道親往督辦嗣
據先後拏獲謝詞封等解省審明按擬具

奏聲明逃犯劉良老五等拏獲另結茲據拏獲劉良老
五及被脅從劫之胡運洪押解來省發委南昌府等訊
供議擬由司審轉經臣提審據供前情不諱究無另犯
不法別案案無遁飾查例載閩粵等省不法匪徒潛謀
糾結復興天地會名目搶劫拒捕者首犯與曾經糾人
之犯俱擬斬立決如平日並無爲匪僅止一時隨同入

會者俱發遣新疆酌撥種地當差等語此案劉良老五
聽從謝詞封結拜天地會入城圖劫該犯爲之糾約黨
羽同行並隨同奪犯與謝詞封同惡共濟自應按例問
擬劉良老五合依閩粵等省不法匪徒潛謀糾結復興
天地會名目搶劫拒捕者首犯與曾經糾人之犯擬斬
立決例擬斬立決胡運洪僅止被誘入會其脅從行劫
旋卽逃回且平日並無爲匪僅止一時隨同入會者發遣新
疆酌撥種地當差例發遣新疆酌撥種地當差雖係南
贛匪徒例應加等第罪至外遣無可復加應毋庸議逸

犯潘蛇羅四邱大等勒緝獲日另結除備錄全案供招
咨部外所有審擬緣由理合恭摺具

奏伏乞

皇上聖鑒勅下法司核覆施行謹

奏道光二十七年十一月十六日奏奉

硃批刑部速議具奏欽此